

Оллоҳнинг Сомад исми

[Ўзбекча – Uzbek – الأوزبكي]



Шайх Содик Юсуф Самарқандий

Ҳоқиқ

Нашрга тайёрловчи ва муҳаррир:
Абу Абдуллоҳ Шоший

من أسماء الله الحسنى "الصمد"

[Ўзбекча – Uzbek –] الأوزبكي



الشيخ صادق يوسف السمرقندى

٤٣٩

تحقيق واعداد:
أبو عبد الله الشاشى

Муқаддима

Барча ҳамд ва мақтovлар Оллоҳга хосдир. Биз Ундан ёрдам сўраймиз. Нафсимизнинг ёмонлиги ва амалларимизнинг шумлигидан паноҳ ҳамда мағфират тилаймиз. Оллоҳ ҳидоят қилган одамни адаштирувчи, адаштирган кимсани ҳидоятловчи йўқдир. Мен ягона, шериксиз Оллоҳдан бошқа илоҳ йўқ, Муҳаммад эса Унинг бандаси ва элчиси эканига гувоҳлик бераман. Ва Пайғамбаримиз Муҳаммадга, ахли оиласи, саҳобалари ва то қиёмат у зотга эргашувчиларга Оллоҳнинг кўпдан-кўп салавоту саломлари бўлсин.

Аммо баъд...

Ассаламу алайкум ва роҳматуллоҳи ва баракатух.

Биз Оллоҳ субҳонаҳу ва таолодан мадад сўраб, Оллоҳ таолони танишлик ҳакида суҳбатлар қилмоқчимиз. Зеро Оллоҳ таолони танишлик ҳар бир нарсанинг асли ҳисобланади ва ҳамма нарса шундан бошланади. Ўзи амалларнинг қабул бўлиш шарти иймондир. Агар иймон бўлмаса амал қабул бўлмайди. Амал ҳар қанча катта бўлса ҳам, қийматли бўлиб кўринса ҳам, лекин иймон бўлмаса, у қабул бўлмайди. Оллоҳ таоло Куръонда шундай дейди: “**Биз уларнинг (яъни кофиirlарнинг) қилган амалларни ҳаммасини худди сочилиган чанг-тўзондай қилиб ташладик**” (Фурқон сураси, 23-оят). Яъни иймон бўлмаса, амалнинг умуман қиймати йўқ ва қабул ҳам бўлмайди. Иймон эса Оллоҳнинг маърифатисиз бўлмайди. Оллоҳни танимасдан ҳеч ким иймон келтира олмайди. Киши Оллоҳни қанчалик таниса, шунчалик иймони бақувват бўлади. Бу нарса, яъни Оллоҳни танишлик аслларнинг

асли ҳисобланади. Агар иймон амалларнинг асли бўлса, иймоннинг асли эса Оллоҳни танишлик — маърифатуллоҳдир. Оллоҳ субҳонаҳу ва таоло Китоби (Қуръон)да Ўзини танитди, Қуръоннинг нозил бўлишидан мақсад ҳам шу эди. Чунки Оллоҳни таниган кишиларгина Оллоҳга ибодат қиласи. Оллоҳ таоло айтади: **“Мен инсон ва жинларни Менга ибодат қилишлари учунгина яратдим”** (Зориёт: 56). Шу оятнинг тафсирида Ибн Аббос разияллоҳу анхумо “илла лияъбудун”ни “илла лияърифун”, яъни “Мени танишлари учун яратдим”, деб тафсир қилган. Чунки Оллоҳни танимаган одам Оллоҳга ибодат қила олмайди. Киши қанчалик даражада Оллоҳни таниса, унинг Оллоҳдан қўрқишлиги шунчалик даражада кўпайиб бораверади. Оллоҳ таоло Қуръонда шундай деган: **“Оллоҳдан бандалари ичидан фақат олимларигина қўрқадилар”** (Фотир: 28). Бундан кўринадики, олим — Оллоҳни таниган сари Оллоҳдан қўрқуви зиёда бўладиган киши экан.

Шунинг учун имом Аҳмад айтганлар: “Илм кўп ҳадис ривоят қилишлик эмас, балки илм — Оллоҳдан қўрқишлиқдир”.

Оллоҳдан ким қўрқади? Олим кишиларгина қўрқади. Бу юқоридаги оятдан олинган маънодир.

Демак, кишининг илми қанчалик даражада кўпайса, шунчалик Оллоҳдан қўрқиши кўпайиб бораверади. Бу ўринда савол туғилади; баъзи бир кишилар одамлар кўзига олим бўлиб кўринади, Қуръоннинг ҳаммасини ёдлаган, ёки “Сунан” китобларини анча-мунча ўқиган, улар нега Оллоҳдан қўрмайдилар?

Бу саволга жавобимиз, унда маълумот бор-у, лекин илм ийќ. Илм — Оллоҳдан қўрқишиликни келтириб чиқарган нарсадир. Бу учун Оллоҳни таниш керак. Биз Оллоҳдан мадад сўраб, баҳолиқудрат шу мавзу ҳақида суҳбат қилиб борамиз...

Оллоҳнинг "Ас-Сомад" исми

Бугунги сұхбатимиз, иншаоллоҳ, Оллоҳ субҳонаху ва таолонинг "Сомад" исми ҳақида. Эҳтимол, бу исм ҳақида күпчилик эшитган, ҳаммамиз билармиз, бу ўринда такрорлаш бўлади. Зеро такрорлаш мўмин кишига фойда беради, толиби илм қанча такрор қилса, шунча фойда олади.

Оллоҳ таолога Унинг "Сомад" исми билан ибодат қилиш ва Оллоҳни таниш

Оллоҳ таолонинг гўзал исм ва сифатлари бор, Оллоҳ таоло айтади: "**Оллоҳнинг гўзал исмлари бор, Оллоҳга мана шу исмлари билан дуо қилинглар!**" (Аъроф: 180).

Оллоҳга дуо қилишлик икки хил бўлади:

1. Оллоҳдан бирор нарсани сўраб дуо қилиш, бу дуоул-масъала, дейилади.
2. Оллоҳ таолони мақтаб, Унга ибодат қилиб дуо қилиш. Оллоҳ таолонинг исмларини айтиб, масалан: "Оллоҳ Ундан ўзга илоҳ йўқ бўлган зотдир. У тирик ва қаййумдир. Уни мудроқ ҳам, уйқу ҳам олмас", демоқ Оллоҳ таолони мақташ, Унга сано айтишдир. Мана шу билан Оллоҳга ибодат қилинади. Яна я Ҳаййу, я Қоййуму, я Карим, деб Оллоҳнинг исмларини айтиб, Унга ибодат қилинади.

Оллоҳ таолонинг мана шундай гўзал исмлари бор, шу исмлари билан Оллоҳга дуо қилиш керак. Инсон дуосида Оллоҳ таолонинг исмларидан бошқа нарсага ўтиб кетса, хаддидан ошган бўлади. Адашган

тоифаларнинг аксарияти мана шу Оллоҳ таолони таниш борасида адашишди. Аҳли суннатнинг Оллоҳ-нинг исм ва сифатлари ҳақида ақидаси қандай бўлиши кераклигини сұхбатимиз давомида аста-секин тушунтириб борамиз. Бу жуда ҳам муҳим нарса, зеро аҳли суннатданман, деб даъво қилган ҳар бир киши билиш керак бўлган қоидалар бор...

Оллоҳ таолонинг “Сомад” исми Куръонда битта жойда келган, қаерда? Ўша ҳамма биладиган сурада келган: “Кул ҳуваллоҳу аҳад, Аллоҳус-сомад” сурасида. Бу муборак сура ҳажми кичик бўлишига қарамай, Расулуллоҳ соллаллоҳу алайҳи ва саллам шаҳодатлари билан Куръоннинг учдан бирига тенг, дейилди. Нега Куръоннинг учдан бири дейилди, Куръон ҳазилакам китоб эмас-ку?! Оллоҳ таоло Куръонда Куръон ҳақида шундай оят нозил қилган: **“Агар у билан тоғлар жойидан жилдириладиган, ё у билан Ер ёриладиган, ёки у билан ўликлар тилга киритиладиган бир китоб бўлса эди (ўша китоб Куръон бўларди). Фақат барча иш ёлғиз Оллоҳницидир”** (Раъд: 31).

Яъни бунинг жавоби маълум бўлгани учун Оллоҳ таоло унинг лафзини нозил қилмасдан маъносига ишора қилган. Маъноси шундай бўлади: Агарда тоғларни жойидан жилдириворишлик учун бир китоб керак дейилса, мана шу Куръон нозил бўларди. Ерларни парча-парча қилиб бўлиб ташлаш учун бир китоб керак дейилса, мана шу Куръон нозил қилинарди. Ёки ўликларни тирилтириш, гапиритириш учун китоб керак дейилса, мана шу Куръон нозил қилинарди. Лекин Оллоҳ таоло Ўзи хоҳлаган ишни қилади.

Ихлос сураси мана шундай буюк китоб — Куръоннинг учдан бирига тенгdir. Бунинг сабаби, бу сурат Оллоҳ таолони энг яхши танитган суралардан ҳисобланишидир.

Демак, Сомад исми Куръонда бир ўринда келган, “Оллоҳ Сомаддир” (Ихлос: 2). Ва ҳадисда ҳам бир ўринда келган, Сунан китоблари соҳиблари ривоятидан қилишган, Абу Довуд раҳимаҳуллоҳнинг ривоятида шундай келган: Расулуллоҳ соллаллоҳу алайҳи ва саллам бир кишининг: “Аллоҳумма инний асалука бианни ашҳаду аннака анталлоҳу, лаа илаҳа илла анта, ал-аҳаду ас-сомад, аллазий лام ялиد ва лам юулад, ва лам якуллаҳу куфуан аҳад, ан тағfirоли зунуби”¹, деб дуо қилганини эшитиб, бу одам Оллоҳнинг исми аъзам, яъни энг буюк исми билан дуо қилди, у шундай исмки, агар шу билан дуо қилинса, Оллоҳ ижобат қиласди, агар ўша исм билан сўралса, Оллоҳ сўраганини беради, дедилар”.

Биз бу нарсадан ғофил бўлмаслигимиз керак. Ўша киши “лаа илаҳа илла анта, ал-аҳаду ас-сомад, аллазий лам ялид ва лам юулад, ва лам якуллаҳу куфуан аҳад”, деб дуо қилган, Сомад исми фақат шу ҳадисда келган.

¹ Маъноси: Эй Оллоҳ, мен Сендан бошқа ҳақ илоҳ йўқ, ягона, тугмаган ва тугилмаган ҳамда бирор нарса Сенга тенг бўлмаган Сомадлигинг билан Сендан менинг гуноҳларимни мағфират қилишингни сўрайман.

² Сендан бошқа ҳақ илоҳ йўқ, ягона, тугмаган ва тугилмаган ҳамда бирор нарса Сенга тенг бўлмаган Сомадсан.

Сомад сўзининг маъноси:

Сомад сўзи араб тилида бир неча маъноларда келади;

1- Сайийд маъносида келади. Араблар саййид, яъни қавмнинг улуғини, усиз ишлар битмайдиган одамни “ҳаазаа рожулун сомад”, дейишади, яъни бу сомад одам дегани. Бу дегани, иш усиз битмайдиган одам, ҳамма шу кишининг гапига суюнади, шу одамнинг гапи гап дегани. Бу лугатдаги маънодир.

2- Ичи ковак эмас деган маънода ишлатилади. Ичи ковак бўлган нарсада эҳтиёж бўлади. Нимаики ичи ковак экан, у заиф бўлади. Оллоҳга гўзал мисолларгина ярашади, биз бу ўринда баъзи мисолларни келтириб ўтамиз, ичи ковак бўлмаган нарса билан ичи ковак нарсанинг фарки бор. Оллоҳ таоло одамни яратиб, қанчадир муддат яратилган холида ерга ташлаб қўйди. Имом Бухорийнинг ривоятида келадики, Оллоҳ таоло одам алайҳис-саломни яратган пайтда унинг узунлиги 60, эни 12 зироъ бўлган. Яъни баландлиги 40 метрдан зиёд бўлган, ҳозирги кунда 13-14 қаватлик биноларнинг узунлигига тўғри келади. Одам алайҳис-саломнинг бўйлари ва эnlари шунча — бўйлари 60, эnlари 12 зироъ бўлган. У зот лойсополдан яратилганди. У ерда ётганида шайтон келиб, бу қандай махлук экан, деб ҳайрон бўлар ва унинг оғзидан кириб, орқасидан, орқасидан кириб, оғзидан чиқарди. Унинг ичи коваклигини кўриб, фариштапарга: “Бу заиф махлук экан, чунки бунинг ичи кавак экан”, дейди.

Ичи ғовак бўлган нарсада эҳтиёж бўлади, ҳақиқатан ҳам шундай ўзи! Инсоннинг ичи ғовак эканлигини ҳаммамиз биламиз. Инсонда кирадиган ва чиқадиган йўллар бор. Шунинг учун инсонда доимий равишда эҳтиёж бўлиб туради. Овқат ейсиз, бироздан кейин яна ҳеч нарса емагандай муҳтож бўлиб тураверасиз. Агар зўр келса, бировга йиғлаб ялинадаган даражада эҳтиёжманд бўлиб тураверади одам. Бир қоринни тўқлаб олгандан кейин, мана тўйдириб олдимми, шу билан умримнинг охиригача кетдим, деган гап йўқ, яна муҳтож бўлиб тураверасиз. Нафас олиш, овқат ейиш, сув ичиш каби нарсаларга инсон доим муҳтож бўлади. Инсоннинг булардан ташқари ҳам эҳтиёжлари жуда кўп, Оллоҳ инсонни мана шундай қилиб яратди ва шундай бўлишини Ўзи хоҳлади. Оллоҳ таоло маҳлукотларнинг ҳаммасини Ўзига муҳтож қилиб яратди. Оллоҳ таоло фардус-сомад бўлган ёлғиз, ҳеч нарсага муҳтож бўлмайдиган Зотdir. У хоссатан инсонни муҳтож қилиб яратди. Инсон ҳавога муҳтож, масалан, Оллоҳ уни ҳаво олмайдиган қилиб яратишга қодир эди, тўғрими? Шунчалик ҳавога муҳтож қилиб қўйдики, нафас олиб-чиқаришни олинг, одам нафас олмай турмайди. Ухласангиз ҳам, турсангиз ҳам, юрсангиз ва югурсангиз ҳам, қандай ҳолатда бўлсангиз ҳам нафас олиш керак. Одамнинг нафасини озроқ қисиб турилса, ҳамма нарсага рози бўлади. Оддий сув ичиш ҳам, овқат ейиш ҳам худди шундай. Инсон иссиққа-ю совуққа, шамолга ҳам муҳтождир. Унга ҳамма нарса керак. Ёруғлик бўлмаса ҳам, қоронғулик бўлмаса ҳам бўлмайди. Эсларингизда бўлса, Қасос сурасида ёруғлик неъмати ҳақида гапиргандик. Агар Оллоҳ

таоло бутун дунёдан қоронғуликни йўқ қилиб, ёруғ қилиб қўйганда эди, Оллоҳдан бошқа ким сизларга қоронғулик неъматини олиб кела оларди?! Демак, Оллоҳ таоло қоронғуликни ҳам бизнинг эҳтиёжимиз учун яратди, ёруғликни ҳам. Қисқаси, ҳамма нарса, шамол ҳам, иссиқлик ҳам, совуқлик ҳам, ейдиган, ичадиган, ҳамма нарса инсоннинг эҳтиёжи учун яратилди. Фарзандга муҳтожмиз, уйланишга муҳтожмиз, аёллар турмуш қуришга муҳтож, инсон ана шундай яратилган. Инсон меҳрга муҳтож, илмга муҳтож. Яна ўйлаб қаранг, турган турмушишимиз муҳтожлиқдан иборат. Ҳозир мана шу туришишимизда ҳам эҳтиёжимиз бор. Ҳали биз билмаган эҳтиёжимиз, масалан, еган овқатимизнинг ҳазм бўлишига қанча эҳтиёжимиз бор, агар кишининг ўт пуфаги ёки ҳазм жараёнида иштирок этадиган аъзоларидан бир ишламай қолса, ўша одам ўтирган жойида ўзи билан ўзи бўлиб қолади. Соғлом одамлар уни сезмай бемалол ўтираверади, унинг ичида эса қанча нарса бўлиб ётибди. Ичида нималар бўляяпти, инсон бу нарсанинг фарқига бормайди!

Демак, Оллоҳ таоло инсонни мана шундай муҳтож қилиб яратди, яна унинг эҳтиёжини то жаннатга киргунича умуман тугамайдиган қилиб яратди. Оллоҳ таоло инсонга жаннатга киргандан кейин ҳамма нарсани муҳайё қилиб қўйди, ейдиган, ичадиган нарсалар, ҳамма ҳамма нарсаларни тайёрлаб қўйди. Лекин инсоннинг барибир эҳтиёжи бор, жаннатга киргандан кейин ҳам эҳтиёжи тўхтамайди...

Демак, Оллоҳ таолонинг Сомад исмини луғавий маъноси, биринчи саййид маъносида, яъни бу дегани

Усиз иш битмайдиган Зот дегани бўлса, иккинчи маъноси, ичи ғовак эмас деганидир.

Шаръий маънода эса, Сомаднинг маъноси, бутун халойик Оллоҳга муҳтож деганидир. Яъни ҳамма нарса бошини кўтариб, Унга эҳтиёжини айтади. Ҳаттоқи эътибор берсангиз, капитар тухум қўяётганда бошини юқорига кўтариб овоз чиқарар экан. Товуқ ҳам тухум қўйиш пайтида бошини осмонга кўтаради. Ҳатто тия ҳам, агар боласи тортиб олинса, одам йиғлагандай йиғлаб нола қилади, кўзларидан ёш оқизиб, кейин охирги иши бошини осмонга кўтариш бўлар экан. Яъни Оллоҳга эҳтиёжини нола қилиб шикоят қилади.

Сулаймон алайҳис-салом ёмғир сўраш учун чиқдилар. Ёмғир сўраш учун мўминлар билан кетиш пайларида йўлда бир чумолини осмонга қараб дуо қилиб турганини эшигдилар. Чунки Сулаймон алайҳис-саломга ҳайвонларнинг тили ўргатилган эди. Чумоли ёмғир сўраб турганди, шунда у киши бўлди, қайтаверинглар, чунки биздан олдин бошқалар ёмғирни сўраб бўлган экан, деб қайтиб келдилар. Яъни ўша чумоли ҳам осмонга қараб Оллоҳга ҳожатини шикоят қилаяпти. Ҳамма нарса, бутун махлукот, денгиздаги балиқларни оласизми, ундан бошқаларни оласизми, ҳатто бизни турган турмушимизнинг бари Оллоҳ таолога муҳтожлиқдан иборат.

Оллоҳус-сомад дегани, бутун халойик Унга муҳтож бўладиган Зот дегани. Яъни мақсад Зот дегани, мақсад дегани эса, У мурод қилинган деганидир. Нима ҳожатингиз бўлса, Оллоҳдан сўранг. Юқорида қушларни, капитар ва товуқни мисол қилдик,

ҳатто ҳайвонларнинг ҳаммаси Оллоҳга эҳтиёжманд эканини билиб турганда, бу жоҳил инсон ва жин эҳтиёжини Оллоҳдан бошқадан сўрайди. Яна кимдан сўрайди? — дeng, ўзига ўхшаган мухтож биридан сўрайди. Ундан ҳам ёмонроғи қабрда ётган одамдан сўраши, ёки ҳайкалнинг ёнига бориб бутдан сўраши, ҳолбуки қабрда ётган одам ўлиқдир. Оллоҳ таоло ўша ҳақида Куръонда айтади: **“Оллоҳни қўйиб, қиёмат кунигача дуосига жавоб бермайдиган бутларга илтижо қилгандардан кўра ким адашган?! (Энг адашган одам ўшадир) Ваҳоланки, улар (яни бутлар) уларнинг қилган дуосидан ғофилдирлар”** (Ахқоф: 5).

Ўша тошлар, чўплар ёки булоқлар-у, дарахтларга бориб сиғинаётган одамлар, ҳожатини айтиб, “менга фарзанд бер!”, “менинг ишимга барака бер!” деб фолбинлардан, қаёқдаги ёлғончи каззоблардан бориб ҳожатларини сўрайдиган одамлар, ҳеч замондан бир вақт ақли жойига келиб, бир ўйлаб кўрмайдимики, бу ўзи менга ўхшаган ҳожатманд бўлса, менинг ҳожатимни каердан бажарсин деб. Масалан, сафарга чиққан бир одам йўлда адашиб қолган бўлса, ёнида ўзига ўхшаб адашиб кетаётган одамдан йўл қаерда, деб сўрамайдику! У ҳам ўзига ўхшаган адашган одам бўлса! Ёки мухтож одам бошқа мухтож одамга — очидан ўламан деб турган одамга бориб, менга нон бер, сув бер, деса, бу нима деган гап бўлади?!

Ҳамма махлуқот, бутун халойиқ ҳожатини Оллоҳга шикоят қиласди. Мўминлар хурсанд пайтида ҳам, шиддат-қийинчилик пайтида ҳам Оллоҳга илтижо қиласа, мунофиқлар эса, фарқли ўлароқ шиддат-

қийинчилик пайтидагина Оллоҳга илтижо қиласылар. Қаранг, ҳатто муноғиқлар ҳам Оллоҳга илтижо қилишади, лекин уларнинг фарқи қийинчилик пайтида илтижо қиласы, холос, кенгчилик пайтида эса Оллоҳдан сўрашмайди. Мана шу уларнинг мўминлардан фарқидир.

Сомад сўзининг иккинчи маъноси, Оллоҳ таоло ичи қовак, ғовак бўлмаган Зот демакдир. Бунинг қандайлиги Оллоҳгагина маълум. Биз Оллоҳ таолонинг сифатлари ҳақида гапирганимизда, маъноларига иймон келтирамиз. Масалан, Оллоҳ таоло эшитади, шундайми? Ҳа, эшитади. Қандай эшитади? Биз у томонини билмаймиз. Унинг кайфияти Оллоҳга маълум, “**Оллоҳ таология ўхшаш ҳеч нарса йўқдир**” (Шуро: 11). Ҳеч бир нарса Оллоҳдай эмас. Оллоҳ таоло эшитувчи, кўрувчи ва ичи ғовак эмасдир. Унинг кайфияти эса Оллоҳга маълум. Оллоҳус-сомад дегани мана шу маънони ҳам беради.

Сомаднинг учинчи маъноси, ҳамма сифатларда комил деганидир. Яъни сомад сўзи араб тилида комил маъносида ҳам ишлатилади. Оллоҳ таоло Холик (Яратувчи)лигига комил, қувватида комил, жабарутиазоблашида комил. Оллоҳ таоло азоблайман деса, етарлича азобни бериб қўяди. Агар неъмат бераман деса, етарлича неъмат бериб қўяди. Оллоҳ таоло ҳикмат соҳибидир, ҳикматда ва илмда комилдир. Оллоҳ таоло ҳеч нарсага муҳтож бўлмайди. Ибнул Қойим раҳимаҳуллоҳ ҳудди шу маънони “*Бадаиул фаваид*” китобида айтган эканлар.

Оллоҳ таоло ҳамма сифатларида комил, илмида комил, эшитишида комил... Хуллас, бу сифатда комил,

у сифатда комил, деб ўтирмасдан Оллоҳ Сомаддир, десангиз етарлидир. Оллоҳус-Сомад деганда инсоннинг хаёлидан ўша маънолар ўтиши керак. Яъни Сомад дегани бутун сифатларда мукаммал даражага етган деганидир. Шундан нима сабабдан “Кул хуваллоҳу аҳад” сураси Қуръоннинг учдан бирга тенг эканини билиб оламиз.

Сомад ниҳоятда катта маънони беради. Яъни Оллоҳ субҳонаху ва таолони бутун сифатларини ўзида жамлайди. Оллоҳ таоло азоб беришда комил, қаҳрда комил, агар бир кишига қаҳр қиласа, етарлича қаҳр қиласи. Агар бир кишини раҳмати билан ўраса, раҳим қиласа, комил раҳим қиласи. Оллоҳнинг раҳмати комил. Агар уни раҳмати нуқсонли бўлганга қиёсласангиз, буни қиёсул авто дейилади, масалан, оналаримиз бизни дўзахга-оловга ташлаб куйдирадими? Албатта куйдирмайди. Лекин онанинг раҳмати комилми ёки ноқисми? Ноқис бўлатуриб ўз фарзандини куйдирмаса, Оллоҳ таолонинг раҳмати комил, уни қандай ўйлайсизлар? Оллоҳ таоло бандасига шунчалик раҳимлики, унга билган ва билмаган ҳамма шароитларни қилиб беради. Оллоҳ таолонинг биз билмаган қанча раҳмати бор. Мана шу коинотнинг ўзида қанча ишлар бўляяпти, узоққа бормасдан, инсон ўзининг аъзолари ҳақида озроқ ўйлаб қараса, қанча неъмат бор. Ибнул Қойим раҳимаҳуллоҳ айтганларки: “Ким ўзини таниса, Раббини танийди”. Ким ўзининг қанчалик ожиз эканлигини, ўзининг муҳтоҷлигини билса ва бу эҳтиёжини қаердан қонаётганлигини билса, инсон ўзидан Оллоҳ таолога сажда қилиб юборади. Инсоннинг маърифати шундай нарсаки, қалбига маърифат

кирган заҳоти инсон бошқа инсонга айланиб қолади. Биз билан саҳобаларнинг ўртасини ажратадиган нарса мана шудир. Мана Саъд ибн Аби Ваққос разияллоҳу анҳуни олайлик, у киши Маккада онасига яхшилиқ қилиш билан машҳур киши бўлган. Саъд ибн Аби Ваққос онасига жуда кўп яхшиликлар қилган. Кейин Расулуллоҳга иймон келтирдилар, унинг иймон келтирганига онаси рози бўлмади, сен бизнинг отабоболармиз динида айнидинг, бу йўлингдан қайтасан, деганида у киши қайтмадилар. Агар қайтмайдиган бўлсанг, мен овқат емасдан очимдан ўламан, кейин одамлар ичида шарманданг чиқиб юрадики, бу онасини ўлдирган, деган гапни бир умр эшитасан, деди. Ўшанда онаси овқат емай қўйди, ҳаттоки овқат ейдиган вақт бўлганда чўп билан оғзини очиб, мажбурлаб оғзига бир-икки луқма тикиб едирадиган даражада овқат емай қўйди. Шунда Саъд онасига: Эй она, мен Оллоҳга иймон келтирдим, агар сизнинг юзта жонингиз бўлиб, ҳар куни битта-битта чиқиб кетса ҳам, мен бу диндан чиқмайман, хоҳланг енг, хоҳланг очингиздан ўлинг, деган экан. Шунда Оллоҳ таоло бу ҳақида Қуръон нозил қилди: “**Агар улар (ота-онанг) сенинг илминг йўқ бўлган нарсага мажбурласалар, уларга итоат қилма. Лекин (улар кофир бўлса ҳам) бу дунёда уларга яхшилик қилгин**” (Луқмон: 15). Агар улар сени кофир бўлишга, Оллоҳга осий бўлишга ундейдиган бўлсалар, унда уларга итоат қилмагин, деган.

Қарангки, Саъд ибн Аби Ваққос олдин онасига яхшилиқ қилиб, айтганидан чиқмасди, Оллоҳга бўлган иймон у кишини тамоман бошқа инсонга ўзгартириб қўйди. Бир калима (тавҳид калимаси), Оллоҳнинг

маърифати инсон қалбига кириб, уни ўзгартиб қўйгани тарихда жуда кўп бўлган.

Унда бизнинг муаммолиз нимада? Эҳсос, яъни ҳис қилишимиз йўқ, беэътибор, ғофил бўлиб қолганмиз. Атрофимизда қанча-қанча ибратли воқеалар бўлиб, ўтиб кетаверади, ундан панду насиҳат олиш деган нарса йўқ. Ҳаёт худди рефлекс шаклига, яъни худди одатий ҳолатга айланаб қолган. Эрталаб бўляяпти, кечкурун бўляяпти, эрталаб бўляяпти, кечкурун бўляяпти, бу ҳаётда қаёққа кетаяпмиз, бу ҳаёт араваси олдинга қараб кетаяпти. У бир кун келиб жарликка тушади, жарга тушиш дегани, бизнинг ўлимимиз дегани. Ҳар биримизнинг ҳаёт араваси шу ёққа қараб тўхтамасдан кетаяпти, бир кун бориб жарликка тушади. Лекин ўша жарликка тушган пайтда жаннат боғига тушадими, ёки дўзах ҷоҳигами? Бундан панду насиҳат олиш учун одамга озроқ эҳсос-ҳис қилиш керак бўлади. Мана Қаънабийнинг воқесини айтиб бергандик, у киши Шўъба ибн Ҳажжожнинг қўлида тавба қилган. У Басрада ароқ ичадиган алкаш одам бўлган. Бир куни шериклари билан ароқ ичишга кетишга ваъдалашиб йўлга чиқиб турганда, Шўъба ибн Ҳажжожга дуч келади. Шўъба мухаддис, катта имомлардан ҳисобланади, худди имом Абу Ҳанифа, имом Моликларга ўхшаган, ҳатто имом Моликлардан ҳам катта киши бўлган. Шу кишини шогирдлари билан келаётганини кўриб, бу шайх ким экан, деб ажабланиб, ким бу? — деса, бу киши мухаддис, дейишади. Мухаддис нима қилади? — деса, ҳадис ривоят қилади, дейишади. Кейин бориб, зшагининг жиловидан ушлаб тўхтатиб, қани менга бир ҳадис айтиб берингчи, дейди. Шунда Шўъба озроқ ўйланиб

туриб, кейин санади билан қола ҳаддасана фулан, қола ҳаддасана фулан, деб қола Ресулуллоҳ соллаллоҳу алайхি ва саллам: “Инна мимма адроканнасу мин калаамил нубувватил увла, иза лам тастаҳий фаснаъ мо шиъта”, маъноси: “Одамлар олдинги пайғамбарлар каломидан топган нарсаларнинг хуносаси шуки, агар уялмасанг, билган ишингни қиласавер”, деганлар (Бухорий ривояти). Уялмасанг билганингни қиласавер деган жойида у кишининг қалбига маърифат кириб келди. Битта калима қалбига кириб келди ва бирдан тавба қилди. Уйига қайтиб келиб, ҳамма ароқ бочкаларини йиқитиб, онасига: Эй она, ўртоқларим келса, мени кетган деб айтинг, энди мен йўқман, деган экан.

Кейин чиқиб одамлардан энг олим ким? — деб сўраганда, одамлар энг олим киши Молик, деган экан. Имом Молик Мадинада бўлса, бу киши Басрада бўлган. У шу жойдан (Ироқдан) тўғри Мадинага қараб жўнаб кетган. Бориб, имом Моликнинг ёнида ўтириб, у киши ўлгунича ундан илм олган экан. Имом Молик ўлганидан кейин, Басрага қайтиб келса, Шўъба ўлиб бўлган экан. Шу тариқа Қаънабий Шўъбадан битта ҳадис эшитган, у юқорида айтилган ҳадис бўлиб, у кишининг ҳаётини ўзгартириб юборган. Қаънабий имом Бухорийнинг шайхи, яъни устози бўлганлар.

Абу Хотим Розий, бу киши муҳаддисларнинг муташаддидларидан, жарҳ ва таъдилда қаттиқ киши бўлган, унча-мунча одамни яхши демайдиган даражада муташаддид. Ҳатто ўша киши Қаънабий ҳақида шундай деганлар: Мен бу кишидек Оллоҳ учун ҳадис айтган бирор муҳаддисни кўрмаганман. Яъни

Қаънабий ҳадисни Оллоҳ учун айтади, деган. Ўшандай алкаш бўлган одам, бир вақтга келиб, ҳаёти қандай даражага ўзгариб кетганини кўринг.

Шайх Абу Исҳоқ хафизаҳуллоҳ айтиб берадилар: Бир куни бир масжидда аёллар тўғрисида муҳозара-маъруза бўлаётган пайтда Оллоҳнинг қадари билан бир раққоса аёл масжиднинг ёнидан ўтиб қолибди. Эри йўқ бўлган бу аёл, эскидан одамларнинг уйларида юриб, пул топаман деб хизмат қилар, унинг эшигини супуриб пул олар, бунинг эшигига бориб, хизмат қилиб пул олар экан... Мана шундай қийналиб юриб, бир аёлга дардини айтса, у бунаقا қийналиб 20 жунайҳ, 50 жунайҳ қилиб юрасанми, ундан кўра артистлик қил, раққосалик қилсанг, катта пул тушади, деб унинг ўша эҳтиёжидан фойдаланиб, раққосаликка олиб кетиб, катта раққоса бўлиб кетган экан. Раққосалик қилиб бойиб кетган. Бир куни консерт бериш учун кетаётган пайтда йўлнинг нариги томонда консерт зал бор экан, ўшанга ўтишдан олдин йўлда тўхтаб туриб, масжиднинг олдида сувлар совутиб қўйиладиган жойдан сув ичаман деб шундай масжид томонга ўтиб сув ичиш пайтида қулоғига маъруза бераётган шайхнинг сўзлари чалинган. Унинг сўзлари қулоғига кирган заҳоти тавбага келган. Масжидга кириб хат ёзиб бераяпти; мени номусимни сақлаб, покиза олиб юрадиган бирорта эркак бўлса, оёғини ювиб хизматини қиласман, мен ҳамма қилган ишимдан тавба қилдим.

Қаранг, битта гап инсоннинг ҳаётини тамоман ўзгаририб юборди. Бизга мана шу нарса етишмайди. Саҳобалар билан бизнинг ўртамиздаги фарқ шунда.

Сомад исми ҳақида гаплашаётган эдик, демак, Сомаднинг биринчи маъноси, бутун ҳожатлар Унга тушадиган Зот дегани. Иккинчиси, У инсонларга ўхшаб ичи ғовак эмас дегани. Учинчи маъноси, комил деган маънода, яъни Оллоҳ таоло ҳамма сифатларида комил Зот дегани. Мана шуниси жуда катта маънони ифодалайди. Оллоҳ таоло азоб беришида комил, раҳматида комил, ... бениҳоят даражада комил Зот дегани.

Тўртинчи маъноси, Сомаднинг бу маъносини Куръонни ўзи тафсир қиласяпти: “Аллазий лам ялид ва лам юуллад”, маъноси: “**У зот туғмаган ва туғилмаган**” (Ихлос: 3). Яъни У ўзидан насл қолдирмаган ва бошқа наслдан ҳам келган эмас. Оллоҳ таоло аввал бўлган Зот, худди шуни Оллоҳ таоло Куръонда бошқа жойда шундай дейди: “**Оллоҳ таоло Аввал бўлган зот**” (Ҳадид: 3), яъни У энг аввалги Зот, ҳамма нарса махлук (яратилмиш) бўлиб, Оллоҳ таоло уларни яратгандан кейин пайдо бўлган. Оллоҳ таоло аввалий йўқ бўлган Зот, яъни азалий ва абадий бўлган Зотдир. У туғмаган ва туғилмаган дегани мана шу маънодадир.

Сомаднинг учинчи маъноси бўлган комиллигини оятдаги “ва лам якуллаҳу куфуван аҳад”дан олдик, маъноси: “**Ҳеч бир киши Оллоҳга тенг бўлмайди**” (Ихлос: 4).

Баъзи ривоятда, “ва лам якуллаҳу куфъан аҳад” бўлиб келган, яъни “**Ҳеч бир киши Оллоҳ таолога тенг бўлмайди**”, деганидир. Ҳеч бир киши ҳеч бир сифатда Оллоҳ таолога тенг бўлмайди.

Сомад исмининг бешинчи маъноси, Усиз ҳеч бир иш битмайдиган Зот дегани. Луғавий маъносида ҳам бу маънони айтган эдик. Араблар сомадни усиз бирор иш битмайдиган зотга нисбатан қўлланадилар. Оллоҳ таоло аралашмаса, ҳеч бир иш бўлмайди. Оллоҳ таоло амр қилмаса, ҳеч бир нарса бўлмайди, агар Оллоҳ таоло уни яратмаса, ҳаттоқи қўл мана шу жойдан тепага кўтарилимай қолади. Бунинг мисолини, исботини кўрсатиш учун Оллоҳ таоло ичимизда баъзи нарсаларни истисно ҳолатда кўрсатиб кўяди. Соппасоғ юрган одам машинасида автоҳалокатга учрайдида тамом қўл-оёғи ишламай қолади. Ҳар биримизга шундай бўлиши мумкинми, ё йўқми? У нарса ҳар одамга бўлиши мумкин. Ўша одамни олайлик, мияси ишлаб турибди, қўлни кўтариш керак деган нарсани билияти, лекин қўл қимиrlамайди. Қимиrlатаман деса ҳам қимиrlамайди. Демак, Оллоҳ таоло яратмаса, шу иш бўлмас экан. Оллоҳ яратмаса ҳеч нарса бўлмайди. Оллоҳ таоло бизга билдириш учун мана шундай нарсаларни истиснойй тарзда кўрсатиб кўйди. Эсларингизда бўлса, Мухаммад Ҳассон айтиб берган ҳикояни айтиб бергандик; Мисрда катта бой киши 600 милион пулинни қўлимни бир ишлатишликка алмашаман, дейди. Машинада авария бўлиб, бўйнидан пасти ишламай қолиб, тўшакка михланиб қолган. Хотини ўлган, бир ўғли бор экан, фақат у ҳам қаергадир кетган. Кундузи билан ҳайдовчим хизмат қилади, кечаси яхши ухлаб ётган бўлади, уйғотай десам ичим ачийди, баданим қичиыйди, ўшани қашишга қўлим бормайди, агар қўлим борса шу пулимни ҳаммасига алмашаман, дейди. 600 милион долларини шу бир

марта тирнаб қўйишга алмашаман, дейди. Бу неъматни ҳеч ўйлаб кўрганмисиз?!

Бу хабар бизга нима учун қайта-қайта етиб келяпти, такрор-такрор эслатиляпти, бу Оллоҳнинг қадари билан бўляпти. Яъни бу нарса бизга шуни эслатади: билингки, агар Оллоҳ яратмаса қўлингиз жойидан қимиrlамайди, оёқ ҳам қимиrlамайди, кўзимиз ёпилмай, шундай очиқлигича қолиб кетади. Буни мана ўлган одамда кўрамиз. Оллоҳ таоло ўлган одамнинг руҳини олиб қўйғандан кейин, қаранг, шундай бир нарсага айланиб қоладики, тезроқ олиб бориб кўмиш керак бўлади, бошқа нарсага арзимайди. Биз учун ҳар қанча азиз одам бўлса ҳам, олиб бориб қабрга кўмиб келишдан бошқа нарса қилолмайсиз. Ҳаммамиз ҳам бир куни ўша ҳолатга тушиб қоламиз. Шундан билайликки, Оллоҳ таоло бизга ёрдам бериб турибди. Ҳатто кўзимизнинг очилиб, ёпилиши ҳам, қўлимизнинг битта ҳаракати ҳам, сочимизнинг битта толасининг ўсиши ва тўкилиши ҳам Оллоҳ таолонинг амри билан бўляпти. Оллоҳ Сомаддир, дегани мана шу маънони беради. Яъни бирон-бир иш Унинг изнисиз, Унинг бошқарувисиз бўлмайди, дегани, у хоҳ катта иш бўлсин, хоҳ кичик.

Шу маънога иймон келтирган одам, яна Оллоҳдан бошқадан умид қиласа, ўзидан кўрсинг. Агар шу маънога иймон келтирган одам, Оллоҳдан бошқадан кўркса, Оллоҳдан бошқанинг маломатидан қўркса, Оллоҳдан бошқани рози қиласан, деб Оллоҳни ғазаблантирса, бу одамдан кўра жоҳил одам бўлмаса керак. Энг жоҳил одам Оллоҳни ғазаблантириб, махлукларни (Оллоҳдан бошқа жонзотларни) рози

қилган одам бўлади ва энг аҳмоқ одам ҳам шу. Ундан ҳам кўра аҳмоқроғи, Оллоҳни ғазаблантириб, ўзининг ҳаётида роҳатланиш учун эмас, бошқа бир одамнинг дунёсини обод қилган одамdir. Мунофиқ бўлиб, на бу ҳаётда яхши яшайди, на охиратда бир насибаси бўлади.

Демак, Оллоҳ Сомадdir дегани жуда катта маъноларни ифода қиласди. Агар ўйлаб қарайдиган бўлсак, Оллоҳ таоло бутун сифатларида комил бўлган Зот экан.

Ва яна бешинчи маъноси, Усиз иш битмайдиган Зот дегани. Ҳеч бир иш Усиз битмайди. **“Оллоҳ таоло ҳар қуни бир иш қилган ҳолдадир”** (Рахмон: 29). Раҳмон сурасини ўқиганимизда мана шу маъно хаёлимизга келиши керак. Оллоҳус-Сомад хаёлимизга бирдан келиши керак. Бу оятнинг маъноси, Оллоҳ ўлдирияпти, тирилтирияпти, кимларнидир азиз қиляпти, кимларнидир хор қиляпти, кимларнидир касал қиляпти, кимгадир шифо беряпти ва ҳоказо ... ҳар қуни бир ишни содир қиласди. Мана шу Оллоҳнинг қиласидиган ишларида биз айланиб-айланиб кетаверамиз, худдики, таъбир жоиз бўлса, биз дарёда оқадиган сувга ўхшаймиз. Оллоҳ хоҳлаган томонига қараб оқизади, биз ўша дарёда бир-биrimизга урилиб-урилиб оқиб кетаверамиз. Бунда тўхтай олмайсиз, орқага қайта олмайсиз, Оллоҳнинг қонуни мана шундай. Фақатгина бу ерда биздан талаб қилинган нарса, биз агар Оллоҳни қалбимиз билан танисак, биз учун бундан кўра баҳтлироқ нарса бўлмайди. Хоҳланг, хоҳламанг ҳаёт ўтиб кетади, бир кун келиб ҳаммамизнинг ҳаётимиз тугайди. Лекин оқибат кимга

бўлади? Оқибат тақвodor одамларники бўлади. Ким тақvodor бўлади? Оллоҳни таниган одам тақvodor бўлади. Расууллоҳ соллаллоҳу алайҳи ва саллам шундай дедилар: “Мен сизларнинг Оллоҳни энг танувчироқларинг ва Оллоҳдан энг тақво қилувчиларингман” (Бухорий ривояти).

Оллоҳдан тақво қиладиган одам ким? Оллоҳни таниган одам тақво қилади. Яна тақрор айтамиз, Оллоҳ сухонаху ва таоло Китобида Ўзини исм-сифатлари билан танитди. Буни араблар жуда ҳам яхши тушунгандар, Сомад калимасини араблар жуда ҳам яхши тушунган. Ҳозир биз Куръони Карим таржималарида Оллоҳус-Сомаднинг таржимасида “Оллоҳ беҳожатдир”, деб таржима қилиб кетганини кўрамиз. Оллоҳ беҳожатдир дегани Сомаднинг тўлиқ маъноси эмас, у жузъий маъноси, холос. Чунки, беҳожатлик билан мақтов бўлмайди, балки бошқаларнинг хожати Унга тушадиган Зот, дейиш керак. Бу биринчидан, иккинчидан эса бу ерда Оллоҳ сифатларида комил дегани маъно айтилмаяпти. Оллоҳус-сомад дегани Оллоҳ таоло бутун сифатларида комил дегани, ҳамма сифатларида; илмида комил, қурдатида комил, ... ҳамма-ҳамма сифатларида комил Зот дегани.

Охирги маъноси, Усиз иш битмайдиган Зот дегани. Ҳеч бир иш Оллоҳнинг ваколатисиз битмайди. **“Оллоҳ таоло ҳамма нарсанинг вакилидир”** (Анъом: 102).

Вакил нима дегани? Сабаблар билан натижа ўртасида Оллоҳнинг ваколати бор, Оллоҳ рухсат бермаса, ўша иш бўлмайди, дегани. Масалан, олов куйдиради, олов куйдириб ёндиришликка сабаб

бўлади, лекин Оллоҳ буюрса куйдиради, буюрмаса куйдирмайди. Буни Иброҳим алайҳис-саломнинг мисолида кўришимиз мумкин. У зот оловга ташланганда олов куйдирмади. Нега куйдирмади? Чунки Оллоҳ таоло оловга нима деди? “**Эй олов, Иброҳимга салқин ва саломатлик бўл!**” деди (Анбиё: 69).

Иброҳим алайҳис-саломнинг оловда куймасдан юриб чиқиб келганини кўрган отаси Озор: “Эй Иброҳим, сенинг Раббинг жуда ҳам яхши зот экан”, деган, лекин кофирлигича қолган. Яъни Оллоҳ таоло қудратини кўрсатиб қўйди, ҳозир ҳам Оллоҳ таоло бизга қудратини кўрсатмаяптими? Ҳар бир нарсанинг ризқи Оллоҳ таолонинг қўлида эмасми? Оллоҳ таоло кимнинг ризқини Ўзидан бошқага топшириб қўйди, айтингчи? Кимнинг эмас, ниманинг ризқини дейлик! На қушларни айтасизми, на балиқларни айтасизми, ҳаётда ниманики бўлса олинг, унинг ризқи кимнинг қўлида? Унинг ризқи Оллоҳ таолонинг зиммасидадир. Биз шунга иймон келтирганмизми? Оллоҳ таоло Қуръонда айтади: “**Ер юзида ўрмалаган нарса борки, унинг ризқи Оллоҳнинг зиммасидадир**” (Худ: 6). Унинг ичига инсон ҳам, чумоли ҳам, пашша, бит, бурга ҳам, ҳамма нарса киради. Жони бор нарса бор экан, унинг ризқи Оллоҳнинг зиммасидадир. Бизнинг ризқимизни Ўзидан бошқага қилиб қўймагани Оллоҳ таолонинг раҳмати бўлди. Агар бизнинг ризқимизни Ўзидан бошқа бирига қилиб қўйганда, инсонлар бу бизнинг ризқимизни беряпти, дея ўшанга ибодат қилиб кетишлари мумкин эди. Бир фариштани бирор тонгнинг устига, ёки бир баланд жойга чиқариб қўйиб, ким нима сўраб борса, фаришта сўраганини бераверишини тасаввур қилинг. Сенга фарзанд

керакми, бор ана фаришта беряпти, менга ўғил, менга қиз, мен касал эдим, шифо бер, у бер, бу бер, нима сўрасангиз, фаришта бераверса, одамлар ўша фариштага ибодат қиласмиди, ё йўқми? Аниқ ўша фариштага ибодат қилиб кетарди!

Оллоҳ таолонинг раҳамтики, бирон-бир нарсани Ўзидан бошқага топширмади. Бўлмаса Оллоҳ таоло яратган фаришталаридан бирини тушириб қўйиб, бу ишларни унга топшириб қўйишга қодир эди. Оллоҳ таоло шундай қилди ҳам, фаришталарга ёмғир, қорларни ёғдиртирди, шамолларни эсдиртирди, бутун коинотдаги ишларни фаришталарга бажартирди, лекин ҳеч бир ризқни фаришталарнинг қўлига қўйиб қўймади. Оллоҳ бу ризқ Менинг зиммада, деди. Одамларнинг умри Оллоҳнинг зиммасида бўлди. Оллоҳ таоло белгилаб берди, фалончи фалонча вакт яшайди, фалон пайтда ўлади, деб ёздирди фариштага. Ибн Масъуд разияллоҳу анхунинг ҳадисида шундай келади: “Сизлардан бирингизнинг жамланиши онасининг қорнида кирқ кунда нутфа ҳолида бўлади. Кейин қирқ кунда алақ-лахта қон ҳолида бўлади. Ундан кейин бир чимдим-бир тишлам гўшт ҳолида бўлади. (Яъни 120 кун бўлгандан) Кейин фаришта юборилади, унинг умри, ризқи, амали, баҳтили ва баҳтиқаролиги ёзиб қўилади” (Бухорий ва Муслим ривояти). Яъни қанча ризқи бор, қанча умри бор, амали қанча, жаннатий ёки дўзахий эканлигини Оллоҳ таоло ёздиртиради. Оллоҳ таоло бу ишни ҳеч кимга, на бир фаришта, на бир пайғамбар, на бир валий ва солих кишиларга қўйиб қўймади. Бу ҳам Оллоҳ таолонинг катта раҳматидандир. Бу нарсалар бизга

Оллоҳнинг Сомад эканлигини билдиради. Демак, Сомад мана шу бешта маънода келади.

Келинг, яна бир такрорлайлик, биринчи маъноси, бутун маҳлукотлар Унга муҳтоҷ дегани.

Иккинчи маъноси, инсонларга ўхшаб ичи ғовак эмас дегани. Бунинг қандай эканини эса Оллоҳнинг Ўзи билади.

Учинчи маъноси, сифатларида комил дегани. Яъни Оллоҳ ҳамма сифатларида комилдир. Мана бу Сомаднинг энг катта маъноларидандир.

Тўртинчиси, учинчи сифатдаги ҳамма сифатларида комил деганини тўлдириб келади, яъни У туғмаган ва туғилмаган ҳамда ҳеч бир нарса Оллоҳдай эмас деган маъно. Туғиш ва туғилиш маҳлукларда бўладиган, Оллоҳ яратган бир нарсадир. Оллоҳ таоло на фарзандга, на аёлга, на ейиш-ичиш каби нарсаларга ҳеч муҳтоҷ бўлмаган Зотдир. Балки бошка маҳлукотлар Оллоҳга муҳтоҷ бўлади.

Бешинчи маъноси, Усиз иш битмайди дегани.

Яна бир бор такрорлаймиз;

Биринчи маъноси, Оллоҳ таоло бутун маҳлукотлар Унга муҳтоҷ бўлган, мақсад Зот. Бирор ишиз бўлса, Оллоҳга қараб кетаверасиз. Худди ҳозир айтганимиздай, паррандалар ҳам, ҳайвонлар ҳам, ҳаммаси Оллоҳга муҳтоҷ бўлади.

Иккинчи маъноси, Оллоҳ инсонларга ўхшаб ичи ғовак эмас.

Учинчи маъноси, Оллоҳ ҳамма сифатларида комил.

Тўртингчи маъноси, Оллоҳ туғилмаган ва Ўзидан насл қолдирмайдиган Зот.

Бешинчи ва охирги маъноси, Усиз иш битмайди. Яъни У шундай саййид зотки, Оллоҳ таоло айтган ишгина бўлади. Ҳатто арзимаган ишлар ҳам шундай. Дараҳтнинг барги ҳам Оллоҳнинг изнисиз тушмайди. **“Битта япроқ узилиб тушмайдики, магар уни ҳам билади”** (Анъом: 59).

Агар биз шу маъноларни кўз олдимизга келтириб Куръонни варақласак, бизга қўп илмлар очилади, иншаоллоҳ.

Сомад исми ҳақида айтмоқчи бўлганларимиз мана шулар эди. Валлоҳу аълам.

